

Negoshá Promé ku Tene Relashon Seksual?

En bista di dia internashonal di AIDS, Fundashon di AIDS di Antia Hulandes (ASNA) a inougurá un lema nobo den nan guera kontra e enfermedat aki: "Negoshá promé ku tene relashon seksual." Zr. Monica Kapel di ASNA a splika ku e kampaña di informashon nobo lo ta dirigí mas parti pa ku e mucha muhé.

Nos ta apoyá e bataya kontra AIDS i otro enfermedatnan. Nos ta di akuerdo ku relashon seksual no mester ta algu imponé riba ningun hende. Sinembargu nos tin un problema serio ku ASNA su idea ku mester negoshá promé ku tene relashon seksual, i ku e negosiashon ei mester ta basá riba uso di kondon.

Pa di promé, e filosofía aki di "safe-sex" ta basá riba e suposishon sumamente kiboká ku kondon ta garantisá protekshon kontra AIDS. Tin amplio dokumentashon ku ta PROBA ku esei ta un MENTIRA peligroso!

Na di dos lugá, e mentalidat aki pa ku AIDS ta kontra tur lógika. Aña pasá un epidemia temibel a asotá Zaire, Afrika. No tabatin skapatorio pa esun ku a kontagiá Ebola. Ebola ta morto sigur. Kiko a sosodé? E lokalidatnan ku a ser trastorná pa e enfermedat aki a wòrdu isolá huntu ku nan habitantenan.

Diariamente hende ku ta kontagiá siertu enfermedat ta ser isolá pa prevení nan di infektá otronan. E medida aki ta bon konosí pa kasonan manera kolera i asta enfermedatnan komun na nos islanan manera sarampi, kachete, i sende paga. Nos no ta boga pa isolá hende ku a kontagiá AIDS. Ma kòrdando ku AIDS, méskos ku Ebola, ta morto sigur (solamente ta dura mas tempu), nos ta hañ'é sumamente straño ku nos tin un mentalidat kasi indiferente pa ku AIDS. Na lugá di avisá hende ku AIDS ta fatal i p'esei mester apstené di TUR kontakto seksual fuera di matrimonio, nos ekspertonan ta eduká nos (na un forma indirèkt, i tin bes dirèkt) pa dal bai ku nos aventuranan immoral ku ken ku ta. Solamente mester "negoshá promé ku tene relashon seksual."

Si bo sa ku Ebola ta trastorná un bario, lo bo keda leu for di e bario ei i evitá kontakto ku su habitantenan, maske nan por ta bon di salú. Ma ku e epidemia di AIDS, nos ekspertonan ta komuniká ku bo por asta tene kontakto INTIMO ku e persona aki basta ku bo ta negoshá promé pa usa kondon. Apsurdo!

Zr. Kapel a aksentuá ku salú i bida di kada hende mester ta na promé lugá. P'esei e ta boga pa mucha muhénan kana ku kondon den tas i si momentu presentá pa hasi sèks e mester saka su kondon i insistí "pa nos seguridat, kondon òf nada." Ma warda un ratu! Si salú i bida di kada hende ta na promé lugá, no ta mas lógiko pa siña nos yunan pa bisa, "pa nos seguridat, NADA TE MATRIMONIO?"

Ki dia lo nos habri wowo i mira ku e UNIKO solushon pa AIDS ta apstenensia te matrimonio? Esei ta nèt loke nos Kreador a preskribí! "No kometé adulterio" (Exodo 20:14), "Hui fornikashon" (1 Korintionan 6:18). Ma nos kier sa ku nos ta mas sabí ku Dios. Nos ta instruí nos hóbennan pa sigui djòdjò, basta ku nan ta usa kondon. Kiko e filosofía di "safe-sex" a logra?

Kada aña 550.000 morto okashoná pa AIDS rònt mundu! Entre 1970 i 1992, gobièrnu merikano a invertí \$3 bion pa promové antikonseptivo i "safe-sex." Na aña 1992 el a invertí \$450 mion adishonal. Kiku ta resultado di e invershon gigantesko aki pa ku edukashon seksual di nan alumnonan? Enfermedatnan venérikò i AIDS ta oumentando bárbaramente! Nan ni a ser redusí!

Ta klaro ku e programa di edukashon seksual di Merka a frakasá, apesar di un invershon di mas ku tres i mei miar dolar. Nos islanan nunca lo por tin \$3.5 bion pa invertí pa eduká hóbennan den uso di kondon. Ma asta si nos tabatin tantu rekursu, e sífranan aki ta indiká bon kla ku tur nos florinnan lo ser gastá pornada si nan a ser usá pa e proposito ei.

E lema, "negoshá promé ku tene relashon seksual" ta ignorá tur sintido moral. Di bèrdat e ta PROMOVE MAS akto immoral...i konsekuentemente ta KONTRIBUI na e epidemia di AIDS. Segun nos Kreador, algu otro mester tuma lugá promé ku relashon seksual, NO NEGOSIASHON. Ta klaro ku e lema ku ASNA--i nos TUR--mester promové no ta e lema "negoshá promé ku tene relashon seksual" ma e lema "MATRIMONIO promé ku tene relashon seksual!"